

摘藻堂四庫全書薈要

史部

欽定四庫全書薈要

史部

舊五代史卷二十八至
三十一

詳校官內閣侍讀臣孫球



欽定四庫全書薈要卷五千四百二十九

舊五代史卷二十八

宋門下侍郎參知政事監修國史薛居正等撰

書第四

莊宗紀二

天祐九年春正月庚辰朔周德威等自飛狐東下丙戌
會鎮定之師進營祁溝庚子次涿州刺史劉知溫以城
歸順德威進迫幽州守光出兵拒戰燕將王行方等

部下四百人來奔二月庚戌朔梁祖大舉河南之衆以
援守光以陝州節度使楊師厚為招討使河陽李周彝
為副青州賀德倫為應接使鄆州袁象先為副甲子梁
祖自洛陽趨魏州遣楊師厚李周彝攻鎮州之棗強命
賀德倫攻蓨縣三月壬午梁祖自督軍攻棗強甲申城
陷屠之時李存審與史建塘以三千騎屯趙州相與謀
曰梁軍若不攻蓨城必西攻深冀吾王方北伐以南鄙
之事付我輩豈可坐觀其弊乃以八百騎趨冀州扼下

博橋令史建塘李都督分道擒生翼日諸軍皆至獲芻
牧者數百人盡殺之縱數人逸去且告晉王至矣建塘
與李都督各領百餘騎旗幟軍號類梁軍與芻牧者雜
行暮及賀德倫營門殺守門者縱火大呼俘斬而旋又
執芻牧者斷其手令迴梁軍乃夜遁蔣人持鉏耰白挺
追擊之悉獲其輜重

通鑑後梁紀云帝晚營夜遁迷失
道委曲行百五十里戊子旦乃至

冀州蔣之耕者皆荷鉏耰追之
委棄軍資器械馬匹不可勝紀梁祖聞之大駭自棗

強馳歸貝州殺其將張正言許從實朱彥柔以其亡師

于蔣也梁祖先抱痼疾因是愈甚辛丑滄州都將張萬進殺留後劉繼威自為滄帥遣人送款于梁亦乞降于帝戊申周德威遣李存暉攻瓦橋關下之四月丁巳梁祖自魏南歸疾篤故也戊申李嗣源攻瀛州拔之五月乙卯朔周德威大破燕軍于羊頭崗擒大將軍廷珪斬首五千餘級德威自涿州進軍于幽州營于城下閏月己酉攻其西門燕人出戰敗之六月戊寅梁祖為其子友珪所弑友珪僭即帝位于洛陽秋八月朱友珪遣其將韓

勅康懷英牛存節率兵五萬急攻河中朱友珪遣使來
求援帝命李存審率師救之十月癸未帝自澤州路赴
河中遇梁將康懷英於平陽破之斬首千餘級追至白
徑嶺朱友謙會帝于猗氏梁軍解圍而去庚申周德威
報劉守光三遣使乞和不報丁卯燕將趙行實來奔天
祐十年春正月丁巳周德威攻下順州獲刺史王在思
二月甲戌朔攻下安遠軍獲燕將一十八人庚寅梁朱
友珪為其將袁象先所殺均王友貞即位于汴州丙申

周德威報檀州刺史陳確以城降三月甲辰朔收盧臺
軍乙丑收古北口時居庸關使胡令珪等與諸戍將相
繼挈族來奔丙寅武州刺史高行珪遣使乞降時劉守
光遣愛將元行欽牧馬于山北聞行珪有變率戍兵攻
行珪行珪遣其弟行溫為質且乞應援周德威遣李嗣
源李嗣本安金全率兵救武州降元行欽以歸四月甲
申燕將李暉等二十餘人舉族來奔德威攻幽州南門
壬辰劉守光遣使王遵化致書哀祈于德威德威戲遵

化日大燕皇帝尚未郊天何怯劣如是耶守光再遣哀祈
德威乃以狀聞己亥劉光濬攻下平州獲刺史張在吉五
月壬寅朔光濬進迫營州刺史楊靖以城降乙巳梁將楊
師厚會劉守奇率大軍侵鎮州時帝之先鋒將史建瑋自
趙州率五百騎入真定師厚大掠鎮冀之屬邑王鎔告急
于周德威德威分兵赴援師厚移軍寇滄州張萬進懼遂降
于梁六月壬申朔帝遣監軍張承業至幽州與周德威會議
軍事秋七月承業與德威率千騎至幽州西守光遣人持信

箭一隻乞修和好承業入燕帥當令子弟一人為質則可是
日燕將司全爽等十一人並舉族來奔辛亥德威進攻諸城
門壬子賊將楊師貴等五十人來降甲子五院軍使李信攻
下莫州時守光繼遣人乞降將緩帝軍陰令其將孟修阮通
謀于滄州節度使劉守奇及求援于楊師厚帝之游騎擒
其使以獻是月帝會王鎔于天長九月劉守光率衆夜出
遂陷順州冬十月己巳朔守光率七百騎步軍五千夜入
檀州庚午周德威自涿州將兵躡之壬申守光自檀州南

山而遁德威追及大敗之獲大將李劉張景紹及將吏
八百五十人馬一百五十匹守光得百餘騎遁入山谷
德威急馳扼其城門守光惟與親將李小喜等七騎奔
入燕城己丑守光遣牙將劉化脩周遵業等以書幣哀
祈德威庚寅守光乘城以病告復令人獻自乘馬玉鞍
勒易德威所乘馬而去俄而劉光濬擒送守光偽殿直
二十五人于軍門守光又乘城謂德威曰予俟晉王至
即泥首俟命祈德威卽馳驛以聞十一月己亥朔帝下

令親往幽州甲辰發晉陽己未至范陽辛酉守光奉禮幣歸款于帝帝單騎臨城邀守光辭以他日蓋為其親將李小喜所扼也是夕小喜來奔帝下令諸軍詰旦攻城壬戌梯輦並進軍士畢登帝登燕丹塚以觀之有頃擒劉仁恭以獻癸亥帝入燕城諸將畢賀十二月庚午墨制授周德威幽州節度使癸酉檀州燕樂縣人執劉守光并妻李氏祝氏子繼祚以獻己卯帝下令班師自雲代而旋時鎮州王鎔定州王處直遣使請帝由井陘

而西許之庚辰帝發幽州擄仁恭父子以行甲申次定
州舍于關城翼日次曲陽與王處直謁北嶽祠是日次
衡唐鎮州王鎔迎謁于路天祐十一年春正月戊戌朔
王鎔以履新之日與其子昭祚昭誨奉觴上壽置宴鎔
啟曰燕主劉太師頃為隣國今欲挹其風儀可乎帝即
命主者破械引仁恭守光至與之同宴鎔饋以衣被飲
食己亥帝發鎮州因與王鎔畋于衡唐之西壬子至晉
陽以組練繫仁恭守光號令而入是日誅守光遣大將

李存霸拘送仁恭于代州刺其心血奠告于武皇陵然後斬之是月鎮州王鎔定州王處直遣使推帝為尚書令初王鎔稱藩于梁梁以鎔為尚書令至是鎮定以帝南破梁軍北定幽薊乃共推崇焉使三至帝讓乃從之遂選日受冊開霸府建行臺如武德故事秋七月帝親將自黃沙嶺東下會鎮人進軍邢洺梁將楊師厚軍于漳東帝軍次張公橋旣而裨將曹進金奔于梁帝軍不利而退八月還晉陽天祐十二年三月梁魏博節度使

賀德倫遣使奉幣乞盟時楊師厚卒于魏州梁主乃割相衛澶三州別為一鎮以德倫為魏博節度使以張筠

為相州節度使魏人不從軍亂囚德倫于牙署三軍大掠軍士有張彥者素實凶暴為亂軍之首迫德倫上章

請卻復六州之地梁主不從遂迫德倫歸于帝且乞師

為援帝命馬步副總管李存審自趙州帥師屯臨清帝

自晉陽東下與存審會

通鑑晉王引大軍自黃澤嶺東下與存審會于臨清猶疑魏人

之詐按賀德倫遣從事司空頴至軍密啟張彥狂勃之兵不進

狀且曰若不翦此亂階恐貽後悔帝默然遂進軍永濟張彥謁見以銀槍効節五百人從皆被甲持兵以自衛帝登樓諭之曰汝等在城濫殺平人奪其妻女數日以來迎訴者甚衆當斬汝等以謝鄴人遽令斬彥及同惡者七人軍士股慄帝親加慰撫而退翼日帝輕裘緩策而進令張彥部下軍士被甲持兵環馬而從命為帳前銀槍都衆心大服梁將劉鄴聞帝至以精兵萬人自洹水趣魏縣帝命李存審帥師禦之帝率親軍于魏縣西

北夾河為柵六月庚寅朔帝入魏州賀德倫上符印請
帝兼領魏州帝從之墨制授德倫大同軍節度使令取
便路赴任帝下令撫諭鄴人軍城畏肅民心大服是時
以貝州張源德據壘拒命南通劉鄩又與滄州首尾相
應聞德州無備遣別將襲之遂拔其城命遼州牙將馬
通為德州刺史以扼滄貝之路秋七月梁檀州刺史王
彥章棄城而遁畏帝軍之逼也以故將李巖為檀州刺
史帝至魏縣因率百餘騎覘梁軍之營是日陰晦劉鄩

伏兵五千于河曲叢木間帝至伏兵忽起大譟而來圍
帝數十重帝以百騎馳突奮擊梁軍辟易決圍而出有
頃援軍至乃解帝顧謂軍士曰幾為賊所笑是月劉鄩
潛師由黃澤西趣晉陽至樂平而還遂軍于宗城初鄩
在洹水數日不出寂無聲迹帝遣騎覘之無斥候者城
中亦無煙火之狀但有鳥止于壘上時見旗幟循堞往
來帝曰我聞劉鄩用兵一步百變必以詭計悞我使視
城中乃縛旗于芻偶之上使驢負之循堞而行得城中

羸老者詰之云軍去已二日矣旣而有人自鄆軍至者
言兵已趣黃澤帝遽發騎追之時霖雨積旬鄆軍倍道
兼行皆腹疾足腫加以山路險阻崖谷泥滑緣蘿引葛
方得少進顛墜巖坂陷于泥淖而死者十二三前軍至
樂平糗糧將竭聞帝軍追躡于後太原之衆在前羣情
大駭鄆收合其衆還自邢州陳宋口渡漳水而東駐于
宗城時魏之軍儲已乏臨清積粟所在鄆引兵據之周
德威初聞鄆軍之西自幽州率千騎至午門及鄆軍東

下急趨南宮知鄆軍在宗城遣十餘騎迫其營擒斥侯者斷其腕令還德威至臨清鄆起軍駐貝州帝率親騎次博州鄆軍于堂邑周德威自臨清率五百騎躡之是日鄆軍于莘縣帝營于莘西一舍城壘相望日夕交關八月梁將賀瓌襲取澶州帝遣李存審率兵五千攻貝州因塹而圍之冬十月有軍士自鄆軍來奔帝善待之乃劉鄆密令齎酖賂帝膳夫欲寘毒于食中會有告者索其黨誅之天祐十三年春二月帝知劉鄆將謀速戰

乃聲言歸晉陽以誘之實勞軍于貝州也令李存審守其營郃謂帝已臨晉陽將乘虛襲鄴遣其將楊延直自澶州率兵萬人會于城下夜半至于南門之外城中潛出壯士五百人突入延直之軍譟聲動地梁軍自亂遲明郃自莘引軍至城東與延直兵會郃之來也李存審率兵踵其後李嗣源自魏城出戰俄而帝自貝州至郃卒見帝驚曰晉王耶因引軍漸郤至故元城西李存勗大軍已成列矣軍前後為方陣梁軍于其間為圓陣四

面受敵兩軍初合梁軍稍衄再合鄩引騎軍突西南而走帝以騎軍追擊之梁步兵合戰短兵既接帝軍鼓譟圍之數重埃塵漲天李嗣源以千騎突入其間衆皆披靡相躡如積帝軍四面斬擊棄甲之聲聞數十里衆既奔潰帝之騎軍追及于河上十百為羣赴水而死梁步兵七萬殲亡殆盡劉鄩自黎陽濟奔滑州是月梁主遣別將王檀率兵五萬自陰地關趨晉陽急攻其城昭義李嗣昭遣將石嘉才率騎三百赴援時安金全張承業

堅守于內嘉才救援于外檀懼乃燒營而遁追擊至陰
地關時劉鄩敗于草縣王檀遁于晉陽梁主聞之曰吾
事去矣三月乙卯朔分兵以攻衛州壬戌刺史米昭以
城降夏四月攻洺州下之五月帝還晉陽六月命偏師
攻閭竇于邢州梁主遣捉生都將張溫率步騎五百為
援至內黃溫率衆來奔秋七月甲寅朔帝自晉陽至魏
州八月大閱師徒進攻邢州相州節度使張筠棄城遁
去以袁建豐為相州刺史依舊隸魏州邢州節度使閭

寶請以城降以忻州刺史蕃漢副總管李存審為邢州節度使以閻寶為西南面招討使遙領天平軍節度使是月契丹入蔚州振武節度使李嗣本陷于契丹九月

帝還晉陽梁滄州節度使戴思遠棄城遁去舊將毛璋入據其城李嗣源帥師招撫璋以城降乃以李存審為

滄州節度使以李嗣源為邢州節度使時契丹犯塞帝

領親軍北征至代州北聞蔚州陷乃班師

遼大太祖紀十一月攻蔚

新武鵠偽五州自代北至河曲踰陰山盡有其地其圍蔚州敵樓無故自壞衆軍大譟乘之不踰時而破之

是月貝州平以滄州降將毛瑋為貝州刺史自是河朔
悉為帝所有帝自晉陽復至于魏州天祐十四年二月
帝聞劉鄩復收殘兵保守黎陽遂率師以攻之不克而
還是月甲午新州將盧文進殺節度使李存矩叛入契
丹遂引契丹之衆寇新州存矩帝之諸弟也治民失政
御下無恩故及于禍帝以契丹王素已堅與武皇屢盟
于雲中約為兄弟急難相救至是容納叛將違盟犯塞
乃馳書以讓之契丹攻新州甚急刺史安金全棄城而

遁契丹以文進部將劉殷為刺史帝命周德威率兵三萬攻之營于城東俄而文進引契丹大至德威拔營而歸因為契丹追躡師徒多喪契丹乘勝寇幽州是時言契丹者或云五十萬或云百萬漁陽以北山谷之間羶車毳幕羊馬彌漫盧文進招誘幽州亡命之人教契丹為攻城之具飛梯衝車之類畢陳于城下鑿地道起土山四面攻城半月之間機變百端城中隨機以應之僅得保全軍民困弊上下恐懼德威問道馳使以聞帝憂

形于色召諸將會議時李存審請急救燕薊且曰我若猶豫未行但恐城中生事李嗣源曰願假臣突騎五千以破契丹閻寶曰但當蒐選銳兵控制山險強弓勁弩設伏待之帝曰吾有三將無復憂矣夏四月命李嗣源率師赴援次于涑水又遣閻寶率師夜過祁溝俘擒而還周德威遣人告李嗣源曰契丹三十萬馬牛不知其數近日所食羊馬過半案巴堅責讓盧文進深悔其來契丹勝兵散布射獵案巴堅帳前不滿萬人宜夜出奇

兵掩其不備嗣源具事以聞

遼史太祖紀四月圍幽州不克六月乙巳望城中有

氣如烟火狀上曰未可攻也以大暑霖潦班師留盧國用守之是契丹主已于六月退師矣

秋七月

辛未帝遣李存審領軍與嗣源會于易州步騎凡七萬

于是三將同謀銜枚東甲尋澗谷而行直抵幽州八月

甲午自易州北循山而行李嗣源率三千騎為前鋒庚

子循大房嶺而東距幽州五十里契丹萬騎遽至存審

嗣源極力以拒之契丹大敗委棄毳幕羶廬弓矢羊馬

不可勝紀進軍追射俘斬萬計辛丑大軍入幽州德威

見諸將握手流涕翼日獻捷于鄴九月班師帝授存審
檢校太傅嗣源檢校太保閻寶加同平章事十月帝自
魏州還晉陽十一月復至魏州十二月帝觀兵于河上
時梁人據楊劉城列柵相望帝率軍履河上而渡盡平
諸柵進攻楊劉城城中守兵三千人帝率騎軍環城馳
射又令步兵持斧斬其鹿角負葭葦以堙塹帝自負一
圍而進諸軍鼓譟而登遂拔其壘獲守將安彥之是夕
帝宿楊劉天祐十五年春正月帝軍狗地至鄆濮時梁

主在洛將修郊禮聞楊劉失守狼狽而還二月梁將謝
彥章帥衆數萬來迫楊劉築壘以自固又決河水瀰漫
數里以限帝軍六月壬戌帝自魏州復至楊劉甲子率
諸軍涉水而進梁人臨水拒戰帝軍小卻俄而鼓譟復
進梁軍漸退因乘勢而擊之交關于中流梁軍大敗殺
傷甚衆河水如絳謝彥章僅得免去是月淮南楊溥遣
使來會兵將致討于梁也秋八月辛丑朔大閱于魏郊
河東魏博幽滄鎮定邢洺麟勝雲朔十鎮之師及奚契

丹室韋吐渾之衆十餘萬部陣嚴肅旌甲照耀師旅之
盛近代為最己酉梁兗州節度使張萬進遣使歸款帝
自魏州率師次于楊劉略地至鄆濮而還遂營于麻家
渡諸鎮列營十數梁將賀瓌謝彥章以軍屯濮州行臺
村結壘相持百餘日帝嘗以數百騎摩壘求戰謝彥章
帥精兵五千伏于堤下帝以十餘騎登堤伏兵發圍帝
十數重俄而帝之騎軍繼至攻于圍外帝于圍中躍馬
奮擊決圍而出李存審兵至梁軍方退是時帝銳于接

戰每馳騎出營存審必扣馬進諫帝伺存審有間卽策馬而出顧左右曰老子妨吾戲耳至是幾危方以存審之言為忠也十二月庚子朔帝進軍距梁軍柵十里而止時梁將賀瓌殺騎將謝彥章于軍帝聞之曰賊帥自相魚肉安得不亡戊午下令軍中老幼令歸魏州悉兵以趣汴庚申大軍毀營而進辛酉次于臨濮梁軍捨營踵于後癸亥次胡柳陂遲明梁軍亦至帝率親軍出視諸軍從之梁軍已成陣橫亘數十里帝亦以橫陣抗之

時帝與李存審總河東魏博之衆居其中周德威以幽
薊之師當其西鎮定之師當其東梁將賀瓌王彥章全
軍接戰帝以銀槍軍突入梁軍陣中斬擊十餘里賀瓌
王彥章單騎走濮陽帝軍輜重在陣西望見梁軍旗幟
皆驚走因自相蹈籍不能禁止帝一軍先敗周德威戰
沒是時陂中有土山梁軍數萬先據之帝帥中軍至山
下梁軍嚴整不動旗幟甚盛帝呼諸軍曰今日之戰得
山者勝賊已據山吾與爾等各馳一騎以奪之帝率軍

先登銀槍步兵繼進遂奪其山梁軍紛紜而下復于土
山西結陣數里時日已晡矣或曰諸軍未齊不如還營
詰朝可圖再戰閻寶進曰深入賊境逢其大敵期于盡
銳以決雌雄況賊帥奔亡衆心方恐今乘高擊下勢如
破竹矣銀槍都將王建及被甲橫槊進曰賊將先已奔
亡王之騎軍一無所損賊衆晡晚大半思歸擊之必破
王但登山縱觀責臣以破賊之效于是李嗣昭領騎軍
自土山北以逼梁軍王建及呼士衆曰今日所失輜重

並在山下乃大呼以奪擊諸軍繼之梁軍大敗時元城
令吳瓊貴鄉令胡裴各部役徒萬人于山下曳柴揚塵
鼓譟助其勢梁軍不之測自相騰籍棄甲山積甲子命
行戰場收獲鎧仗不知其數時帝之軍士有先入大梁
問其次舍者梁人大恐驅市人以守其殘衆奔潰汴者
不滿千人帝軍遂拔濮陽

舊五代史卷二十八

舊五代史卷二十八考證

唐莊宗紀二梁祖自督軍攻棗強甲申城陷屠之。甲申通鑑作丙戌

乃以八百騎趨冀州。案通鑑作五百騎

周德威大破燕軍于羊頭岡。案通鑑作龍頭岡考異引莊宗實錄作羊頭岡

十一月己亥朔帝下令親征幽州。案歐陽史作十月劉守光請降王如幽州

是日誅守光。○案遼史太祖紀七年正月晉王李存勗拔幽州擒劉守光。考遼史太祖七年即天祐十年。莊宗以天祐十年冬始拔幽州。十一年正月乃凱旋也。遼史誤以次年事先一年書之。

遣使推帝為尚書令。○案通鑑考異引唐實錄云天祐八年晉王已稱尚書令。是書作天祐十一年與唐實錄異。

是月二十九日夜。○案通鑑考異引莊宗實錄作二十

七日今考是書賀德倫傳作二十九日與此紀合
以故將李巖為澶州刺史。李巖通鑑考異引莊宗實
錄作李巖

次圍而出。案通鑑作自午至申乃得出亡其七騎
遣將石嘉才。嘉才梁紀作袁才唐列傳作家財

以袁建豐為相州刺史依舊隸魏州。案通鑑作四月
晉人拔洺州以魏州都巡檢使袁建豐為洺州刺史
八月晉人復以相州隸天雄軍以李嗣源為刺史與

是書異

是月契丹入蔚州振武節度使李嗣本陷于契丹。○案歐陽史及通鑑俱從是書作蔚州遼史太祖紀作神冊元年八月拔朔州擒節度使李嗣本與是書異

是月淮南楊溥遣使來會兵將致討于梁也。○案十國春秋吳世家作七月晉王李存勗遣間使持帛書會兵伐梁王辭以虔州之難與是書異

舊五代史卷二十八 政證

欽定四庫全書蒼要卷五千四百三十

舊五代史卷二十九

宋門下侍郎參知政事監修國史薛居正等撰

唐書第五

莊宗紀三

天祐十六年春正月李存審城德勝夾河為柵帝還魏
州命昭義軍節度使李嗣昭權知幽州軍府事三月帝
兼領幽州遣近臣李紹宏提舉府事夏四月梁將賀瓌

圍德勝南城百道攻擊復以艨艟扼斷津渡帝馳而往陣於北岸南城守將氏延賞告急且言矢石將盡帝以重賄召募能破賊艦者於是獻技者數十或言能吐火焚舟或言能禁呪兵刃悉命試之無驗帝憂形於色親從都將王建及進曰臣請効命乃以巨索連舟十艘選効節勇士三百人持斧被鎧鼓枻而進至中流梁樓船三層蒙以牛革懸板為楯建及率持斧者入艨艟間斬其竹竿破其懸楯又於上流取甕數百用竹竿維之積

薪于上灌以脂膏火發亘空又以巨艦載甲士令乘煙鼓譟梁之樓船斷絀而下沈溺者殆半軍旣得渡梁軍乃退命騎軍追襲至濮陽俘斬千計賀瓌由此飲氣遘疾而卒秋七月帝歸晉陽八月梁將王瓚帥衆數萬自黎陽渡河營于楊村造舟爲梁以通津路冬十月帝自晉陽至魏州發徒數萬以廣德勝北城自是日與梁軍接戰十二月戊戌帝軍于河南夜伏兵于潘張村梁軍寨下以騎軍掠其餉運擒其斥候梁王瓚結陣以待帝

軍以鐵騎突之諸軍繼進梁軍大奔赴水死者甚衆瓚走保北城天祐十七年春幽州民於田中得金印文曰關中龜印李紹宏獻於行臺秋七月梁將劉鄩尹皓寇同州先是河中節度使朱友謙取同州以其子令德主留務請梁主降節梁主怒不與遂請旌節於帝梁主乃遣劉鄩與華州節度使尹皓帥兵圍同州友謙來告難帝遣蕃漢總管李存審照義節度使李嗣昭代州刺史王建及率師赴援九月師至河中朝至夕濟梁人不意

王師之至望之大駭明日約戰與朱友謙謀遲明進軍拒梁壘梁人悉衆以出蒲人在南王師在北騎軍既接蒲人小郤李嗣昭以輕騎抗之梁軍奔潰追斬二千餘級是夜劉鄩收餘衆保營自是閉壁不出數日鄩遂宵遁王師追及於渭河所棄兵仗輜重不可勝計劉鄩尹皓單騎獲免未幾鄩憂恚發病而卒王師畧地至奉先嗣昭因謁唐帝諸陵而還天祐十八年春正月魏州開元寺僧傳真獲傳國寶獻於行臺驗其文即受命於天

子孫寶之八字也羣寮稱賀傳真師於廣明中遇京師
喪亂得之祕藏已四十年矣篆文古體人不之識至是
獻之時淮南楊溥西川王衍皆遣使致書勸帝嗣唐帝
位帝不從二月代州刺史王建及卒是月鎮州大將張
文禮殺其帥王鎔時帝方與諸將宴酒酣樂作聞鎔遇弒
遽投解而泣曰趙王與吾把臂同盟分如金石何負於
人覆宗絕祀冤哉先是滹沱暴漲漂闌城之半溺死者
千計是歲天西北有赤祲如血占者言趙分之災至是

果驗時張文禮遣使請旄節於帝帝曰文禮之罪期於
無赦敢邀予旄節左右曰方今事繁不欲與人生事帝
不得已而從之乃承制授文禮鎮州兵馬留後三月河
中節度使朱友謙昭義節度使李嗣昭滄州節度使李
存審定州節度使王處直邢州節度使李嗣源成德軍
兵馬留後張文禮遙領天平軍節度使闕寶大同等軍節
度使李存璋新州節度使王郁振武節度使李存進同
州節度使朱令德各遣使勸進請帝紹唐帝位帝報書

不允自是諸鎮凡三上章勸進各獻貨幣數十萬以助

即位之費帝左右亦勸帝早副人望帝撝挹久之

九國志趙

季良傳季良常夢手扶御座自謂輔佐之家

秋七月河

由是頗述天時人事以諷莊宗深納其言

東節度副使盧汝弼卒八月庚申令天平節度使閻寶

成德兵馬留後符習率兵討張文禮於鎮州初王鎔令

偏將符習以本部兵從帝屯於德勝文禮既行弑逆忌

鎔故將多被誅戮因遣使聞於帝欲以他兵代習歸鎮

習等懼請留帝令傳旨於習及別將趙仁貞烏震等明

正文禮執逆之罪且言爾等負戟從征蓋君父之故銜
冤報恩誰人無心吾當給爾資糧助爾兵甲爾試思之於
是習等率諸將三十餘人慟哭於牙門請討文禮帝因
授習成德軍兵馬留後以部下鎮冀兵致討於文禮又
遣闔寶以助之以史建瑋為前鋒甲子攻趙州刺史王
鉞送符印以迎闔寶遂引軍至鎮州城下營於西北隅
是月張文禮病疽而卒其子處瑾代掌軍事九月前鋒
將史建瑋與鎮人戰於城下為流矢所中而卒冬十月

己未梁將戴思遠攻德勝北城帝命李嗣源設伏於戚

城令騎軍挑戰梁軍大至帝御中軍以禦之時李從珂

僞為梁幟奔入梁壘斧其眺樓持級而還梁軍愈恐步

兵漸至李嗣源以鐵騎三千乘之梁軍大敗俘斬二萬

計辛酉閻寶上言定州節度使王處直為其子都幽於

別室都自稱留後

歐陽史王處直叛附於契丹其子都幽處直以來附

十一月帝

至鎮州城下張處瑾遣弟處琪募客齊儉等候帝乞降

言猶不遜帝命囚之時王師築土山以攻其壘城中亦

起土山以拒之旬日之間機巧百變張處瑾令韓正時以千騎夜突圍將入定州與王處直議事為我游軍追擊破之餘衆保衡唐賊將彭贇斬正時以降十二月辛未王郁誘契丹案巴堅寇幽州

契丹國志王處直在定州以鎮定為唇齒恐鎮

亡而定狐乃潛使人語其子王郁使賂契丹令犯塞以救鎮州之圍王郁說太祖曰鎮州美女如雲金帛似山天皇遠往則皆為己物也不然則為晉王所有矣太祖以為然率衆而南遂引軍涿州陷之

又寇定州王都遣使告急帝自鎮州率五千騎赴之天祐十九年春正月甲午帝至新城契丹前鋒三千騎至

新樂是時梁將戴思遠乘虛以寇魏州軍至魏店李嗣源自領兵馳入魏州梁人知其有備乃西渡洹水陷成安而去時契丹渡沙河而諸將相顧失色梁人內侵鄴城危急皆請旋師唯帝謂不可乃率親騎至新城契丹萬餘騎遽見帝軍惶駭而退帝分軍為二廣追躡數十里獲案巴堅之子時沙河水薄橋梁隘狹敵爭踐而過陷溺者甚衆案巴堅方在定州聞前軍敗退保望都帝至定州王都迎謁是夜宿於開元寺翼日引軍至望都

契丹逆戰帝身先士伍馳擊數四敵退而結陣帝之徒
兵亦陣于水次李嗣昭躍馬奮擊敵衆大潰俘斬數千
追擊至易州獲氈裘毳幕羊馬不能勝計時歲且北至
大雪平地五尺敵乏芻糧人馬斃踣道路纍纍不絕帝
乘勝追襲至幽州

契丹國志晉王趨勢都為契丹所圍
力戰出入數四不解李嗣昭引三百

騎橫擊之晉王始得出因縱兵奮擊太祖兵敗遂北至
易州會大同彌旬平地數尺人馬死者相屬太祖乃歸

是月梁將戴思遠寇德勝北城築壘穿塹地道雲梯晝
夜攻擊李存審極力拒守城中危急帝自幽州聞之倍

道兼行以赴梁人聞帝至燒營而遁三月丙午王師敗於鎮州城下闔寶退保趙州時鎮州累月受圍城中艱食王師築壘環之又決滹沱水以絕城中出路是日城中軍出攻其長圍皆奮力死戰王師不能拒引師而退鎮人壞營壘取其芻糧者累日帝聞失律即以昭義節度使李嗣昭爲北面討招使進攻鎮州夏四月嗣昭爲流矢所中卒於師己卯天平節度使闔寶卒以振武節度使李存進爲北面招討使是月大同節度使李存璋

卒五月乙酉李存進圍鎮州營於東渡八月梁將段凝

陷衛州刺史李存儒被擒存儒本俳優也帝以其膂力

故以為衛州刺史既而誅欽無度人皆怨之故為梁人

所襲

九國志趙季良傳莊宗入鄴時兵革屢興屬邑租賦逋欠一日莊宗召季良切責之季良對曰殿下

何時平河南莊宗正色曰爾掌輿賦而稽緩安問我勝負乎季良曰殿下方謀攻守復務急徵一旦衆心有變恐河南非殿下所有莊宗欽容

前席曰微君之言幾失吾大計

梁將戴思遠又陷共城新

鄉等邑自是澶淵之西相州之南皆為梁人所據九月

戊寅朔張處球悉城中兵奄至東垣渡急攻我之壘門

時騎軍已臨賊城不覺其出李存進惶駭引十餘人鬪於橋上賊退我之騎軍前後夾擊之賊衆大敗步兵數千殆無還者是役也李存進戰歿於師以蕃漢馬步總管李存審為北面招討使以攻鎮州丙午夜趙將李再豐之子冲投綆以接王師諸軍登城遲明畢入鎮州平獲處球處理瑛并其母及同惡高濛李肅齊儉等皆折足送行臺鎮人請醢而食之發張文禮尸磔於市帝以符習為鎮州節度使烏震為趙州刺史趙仁貞為深

州刺史李再豐為冀州刺史鎮人請帝兼領本鎮從之
乃以符習遙領天平軍節度使十一月河東監軍張承
業卒十二月以魏州觀察判官張憲權知鎮州軍州事
同光元年春正月丙子五臺山僧獻銅甕三言於山中
石崖間得之二月新州團練使李嗣肱卒是時以諸藩
鎮相繼上賤勸進乃命有司制置百官省寺仗衛法物期
以四月行即位之禮以河東節度判官盧質為大禮使
三月己卯以橫海軍節度使內外蕃漢馬步總管李存

審為幽州節度使潞州留後李繼韜叛送款於梁是月

築即位壇於魏州牙城之南夏四月己巳帝昇壇祭告

昊天上帝遂即皇帝位文武臣寮稱賀禮畢御應天門

宣制改天祐二十年為同光元年大赦天下自四月二

十五日昧爽以前除十惡五逆放火行劫持杖殺人官

典犯贓屠牛鑄錢合造毒藥外罪無輕重咸赦除之應

蕃漢馬步將校並賜功臣名號超授檢校官已高者與

一子六品正員官兵士並賜等第優給其戰歿功臣各

加追贈仍定諡號民年八十已上與免一子役内外文武職官並可直言極諫無有隱諱貢選二司宜令有司速商量施行雲應蔚朔易定幽燕及山後八軍秋夏稅率量與蠲減民有三世以上不分居者與免雜徭諸道應有祥瑞不用聞奏赦書所未該委所司條奏以聞云是歲自正月不雨人心憂恐宣赦之日澍雨溥降初唐咸通中金水土火四星聚於畢昴太史奏畢昴趙魏之分其下將有王者懿宗乃詔令鎮州王景崇被袞冕

攝朝三日遣臣下備儀注軍府稱臣以厭之其後四十
九年帝破梁軍於栢鄉平定趙魏至是即位於鄴宮是
月以行臺左丞相豆盧革為門下侍郎同中書門下平
章事太清宮使以行臺右丞相盧澄為中書侍郎平章
事監修國史以前定州掌書記李德休為御史中丞以
河東節度使官盧質為兵部尚書充翰林學士承旨以
河東掌書記馮道為戶部侍郎充翰林學士以魏博鎮
冀觀察判官張憲為工部侍郎充租庸使以中門使郭

崇韜昭義監軍使張居翰並為樞密使以權知幽州軍
府事李紹宏為宣徽使以魏博節度判官王正言為
禮部尚書行興唐尹以河東軍城都虞侯孟知祥為太
原尹充西京副留守以澤潞節度判官任圜為工部尚
書兼真定尹充北京副留守詔升魏州為東京興唐府
改元城縣為興唐縣貴鄉縣為廣晉縣以太原為西京
以鎮州為北都是時所管節度一十三州五十閏月丁
丑以李嗣源為檢校侍中依前橫海軍節度使內外蕃

漢副總管以幽州節度使李存審為檢校太師兼中書
令依前蕃漢馬步總管以河東節度使朱友謙為檢校
太師兼尚書令安國軍節度使符習加同平章事定州
節度使王都加檢校侍中是月追尊曾祖蔚州太保為
昭烈皇帝廟號懿祖夫人崔氏曰昭烈皇后追尊皇祖
代州太保為文景皇帝廟號獻祖夫人秦氏曰文景皇
后追尊皇考河東節度使太師中書令晉王為武皇帝
廟號太祖詔於晉陽立宗廟以高祖神堯皇帝太宗文

皇帝懿宗昭聖皇帝昭宗聖穆皇帝及懿祖以下為七
廟甲午契丹寇幽州至易定而還時有自鄆來者言節
度使戴思遠領兵在河上州城無守兵可襲而取之帝
召李嗣源謀曰昭義阻命梁將董璋攻迫澤州梁志在
澤潞不慮別有事生汶陽無備不可失也嗣源以為然
壬寅命嗣源率步騎五千箝枚自河趨鄆是夜陰雨我師
至城下鄆人不覺遂乘城而入鄆州平制以李嗣源為
天平軍節度使梁主聞鄆州陷大恐帝令王彥章代戴

思遠總兵以來拒時朱守殷守德勝南城帝懼彥章奔
衝遂幸澶州五月辛酉彥章夜率舟師自楊村浮河而
下斷德勝之浮橋攻南城陷之帝令中書焦彥賓馳至
楊劉固守其城命朱守殷撤德勝北城屋木攻具浮河
而下以助楊劉是時德勝軍食芻茭薪炭數十萬計至
是令人輦負入澶州事既倉卒耗失殆半朱守殷以所
毀屋木編棧置步軍于其上王彥章以舟師沿流而下
各行一岸每遇轉灘水滙卽中流交鬪流矢雨集或全

舟覆沒一彼一此終日百戰比及楊劉死亡其半已已王彥章段凝率大軍攻楊劉南城焦彥賓與城守將李周極力固守梁軍晝夜攻擊百道齊進竟不能下遂結營於楊劉之南東西延袤十數柵六月己亥帝親御軍至楊劉登城望見梁軍重壕複壘以絕其路帝乃選勇士持短兵出戰梁軍於城門外連延屈曲穿掘小壕伏甲兵於中候帝軍至則弓弩齊發師人多傷兵不得進帝患之問計於郭崇韜崇韜請於下流據河築壘以救

鄆州又請帝日令勇士挑戰旬日之內寇若不至營壘必成帝善之即令崇韜與毛璋率數千人中夜往博州濟河東晝夜督役居六日營壘將成戊子梁將王彥章杜晏球領徒數萬晨壓帝之新壘時板築雖畢牆仞低庠戰具未備沙城散惡王彥章列騎環城虐用其人使步軍堙壕登堞又於上流下巨艦十餘艘扼斷濟路自旦至午攻擊百端城中危急帝自揚劉引軍陣于西岸城中望之大呼帝驍舟將渡梁軍遂解圍退保鄒家口

秋七月丁未帝御軍沿河而南梁軍棄鄒家口夜遁委

棄鍋甲芻糧千計戊午遣騎將李紹貽直抵梁軍壘梁
益恐又聞李嗣源自鄆州引大軍將至己未夜梁軍拔
營而遁復保於楊村帝軍屯於德勝甲子帝幸楊劉城
巡視梁軍故壘八月壬申朔帝遣李紹斌以甲士五千
援澤州初李繼韜之叛也潞之舊將裴約以兵戍澤州
不徇繼韜之逆既而梁遣董璋率衆攻其城約拒守久
之告急於帝故遣紹斌救之未至而城已陷裴約被害

帝聞之嗟痛不已甲戌帝自楊劉歸鄴梁以段凝代王
彥章為帥戊子凝帥衆五萬結營於王村自高陵渡河
帝軍遇之生擒梁前鋒軍士二百人戮於都市庚寅帝
御軍至朝城戊戌梁左右先鋒指揮使康延孝領百騎
來奔帝虛懷引見賜御衣玉帶屏人問之對曰臣竊觀
汴人兵衆不少論其君臣將校則終見敗亡趙巖趙鵠
張漢傑居中專政締結宮掖賄賂公行段凝素無武畧
一朝便見大用霍彥威王彥章皆宿將有名翻出其下

自彥章獲德勝南城梁主亦稍獎使彥章立性剛暴不
耐凌制梁主每一發軍即令近臣監護進止可否悉取
監軍處分彥章悒悒形於顏色自河津失利段凝彥章
又獻謀欲數道舉軍令董璋以陝虢澤潞之衆趨石會
關以寇太原霍彥威統關西汝洛之衆自相衛以寇鎮
定段凝杜晏球領大軍以當陛下令王彥章張漢傑統
禁軍以攻鄆州決取十月內大舉又自滑州南決破河
堤使水東注曹濮之間至於汶陽瀰漫不絕以陷壯軍

臣在軍側聞此議臣惟汴人兵力聚則不少分則無餘
陛下但待分兵領鐵騎五千自鄆州兼程直抵於汴不
旬日天下事定矣帝憚然壯之九月壬寅帝在朝城
疑兵至臨河南與帝之騎軍接戰是時澤潞叛衛州黎
陽爲梁人所據州以西相以南寇鈔日至編戶流亡計
其軍賦不支半年又王郁盧文進召契丹南侵瀛涿及
聞梁人將圖大舉帝甚憂之召將吏謀其大計或曰自
我得汶陽以來須大將固守城門之外元是賊疆細而

料之得不如失今若馳檄告諭梁人却衛州黎陽以易
鄆州指河為界約且休兵我國力稍集則議改圖帝曰
嘻行此謀則無葬地矣時郭崇韜勸帝親御六軍直趨
汴州半月之間天下可定帝曰正合朕意大丈夫得則
為王失則為寇予行計決矣又問司天監對曰今歲時
不利深入必無成功帝弗聽戊辰梁將王彥章率衆至
汶河李嗣源遣騎軍偵視至遽公鎮梁軍來挑戰嗣源
以精騎擊而敗之生擒梁將任釗田章等三百人俘斬

二百級彥章引衆保於中都嗣源飛驛告捷帝置酒大
悅曰是當決行渡河之策已已下令軍中將士家屬並
令歸鄴

舊五代史卷二十九

舊五代史卷二十九攷證

唐莊宗紀三未幾鄴憂恚發病卒。案梁書劉鄩傳作遇酖而卒

鎮州大將軍張文禮殺其帥王鎔。案歐陽史作正月趙將張文禮弑其君鎔五代春秋作三月趙人張文禮殺其君鎔與是書繫二月前後互異

遂引軍涿州陷之。案契丹陷涿州在天祐十八年李嗣弼傳作天祐十九年紀傳互異

行臺右丞相盧澄。○盧澄歐陽史作盧程攷北夢瑣言亦作澄今仍其舊

帝令中書焦彥賓馳至楊劉固守其城。○案通鑑作帝令宦者焦延賓急趨楊劉與鎮使李周固守其城六月己亥帝親御軍至楊劉。○案己亥通鑑作乙亥帝艤舟將渡梁軍遂解圍。○案歐陽史作六月及王彥章戰於新壘敗之据是書則王彥章因救至而解圍未嘗敗績也

遣騎將李紹貽○李紹貽通鑑作李紹榮

至遞公鎮○遞公鎮通鑑從莊宗實錄作遞坊鎮攷是
書明宗紀亦作遞坊惟通鑑攷異所引薛史作遞公
今姑仍其舊

案巴堅舊作阿保機今改

舊五代史卷二十九考證

欽定四庫全書薈要卷五千四百三十一

舊五代史卷三十

宋門下侍郎參知政事監修國史薛居正等撰

唐書第六

莊宗紀四

同光元年冬十月辛未朔日有蝕之是日皇后劉氏皇子繼岌歸鄴宮帝送于離亭獻歆而別詔宣徽使李紹宏宰相豆盧革租庸使張憲興唐尹王正言同守鄴城

壬申帝御大軍自楊劉濟河癸酉至鄆州是夜三鼓渡汶時王彥章守中都甲戌帝攻之中都素無城守師既雲合梁衆自潰是日擒梁將王彥章及都監張漢傑趙廷隱劉嗣彬李知節康文通王山興等將吏二百餘人斬馘二萬奪馬千匹時既獲中都之捷帝召諸將謀其所向或言且徇兗州徐圖進取唯李嗣源曰宜急趨汴州段凝方領大軍駐于河上假如便來赴援直路又阻決河須自滑州濟渡十萬之衆舟楫焉能卒辦此去汴

城咫尺若晝夜兼程信宿卽至段凝未起河濡夷門已為我有矣臣請以千騎前驅陛下御軍徐進鮮不克矣帝嘉之是夜嗣源率前軍先進翼日車駕卽路丁丑次曹州郡將出降己卯遲明前軍至汴城嗣源令左右捉生攻封丘門梁開封尹王瓚請以城降俄而帝與大軍繼至王瓚迎帝自大梁門入梁朝文武官屬于馬前謁見陳敘世代唐臣陷在偽廷今日再睹中興雖死無恨帝諭之曰朕二十年血戰蓋為卿等家門無足憂矣各

復乃位時梁末帝朱鎰已為其將皇甫麟所殺獲其首
函之以獻是日賜樂工周匝幣帛周匝者帝之寵伶也
胡柳之役陷于梁帝每思之至謁見時欣然慰接周匝
因言梁教坊使陳俊保庇之恩垂泣推薦請除郡守帝
亦許之庚辰帝御玄德殿梁百官于朝堂待罪詔釋之
壬午段凝所部馬步軍五萬解甲于封丘凝等率大將
先至請死詔各賜錦袍御馬金幣帝幸北郊撫勞降軍
各令還本營丙戌詔曰懲惡勸善務振紀綱激濁揚清

須明真偽蓋前王之令典為歷代之通規必按舊章以
令多士而有志朋僭竊位忝崇高累世官而皆受唐恩
貪爵祿而但從偽命或居台鉉或處權衡或列近職而
預機謀或當峻秩而掌刑憲事分逆順理合去留偽宰
相鄭珏等一十一人皆本朝簪組儒苑品流雖博識多
聞備明今古而修身慎行頗負祖先昧忠貞而不度安
危專利祿而全虧名節合當大辟無恕近親朕以纘嗣
丕基初平巨憝方務好生之道在行含垢之恩湯網垂

仁既務全族舜刑投裔氣貨一身爾宜自新我全大體
其為顯列不竝庶寮餘外應在周行悉仍舊貫凡居中
外咸體朕懷乃貶梁宰相鄭珏為萊州司戶蕭頊為登
州司戶翰林學士劉岳為均州司馬任贊房州司馬姚
顗復州司馬封翹唐州司馬李懌懷州司馬竇夢徵沂
州司馬崇政院學士劉光素密州司戶陸崇安州司戶
御史中丞王權隨州司戶竝員外置同正員是日以梁
將段凝上疏奏梁朝權臣趙巖等並助成虐政結怨于

人聖政惟新宜誅首惡乃下詔曰朕既殄僞庭顯平國
患好生之令含弘雖切于予懷懲惡之規決斷難違于
衆請況趙巖趙鵠等自朕收城數日布惠四方尚匿迹
以潛形罔悛心而草面湏行赤族以謝衆心其張漢傑
昨于中都與王彥章同時俘獲此際未詳行止偶示哀
矜今既上將陳詞羣情激怒往日旣彰于僭濫此時難
漏于網羅宜寘國刑以塞羣論除妻兒骨肉外其他疎
屬僕使並從釋放敬翔李振首佐朱溫共傾唐祚屠害

宗屬殺戮朝臣既寰宇以皆知在人神而共怒敬翔雖
聞自盡未豁幽冤宜與李振並族于市疎屬僕使並從
原有朱珪素聞狡蠹唯矜讒邪鬪惑人情枉害良善將
清內外湏切去除況衆狀指陳亦宜誅戮契丹實喇鄂
博既棄其母又背其兄朕比重懷來厚加恩渥看同骨
肉錫以姓名兼分符竹之榮疊被頒宣之渥而乃輒辜
重惠復背明廷罔顧欺違竄歸偽室既同梟獍難貸刑
章可并妻子同戮于市其朱氏近親趙鵠正身趙巖家

屬仰嚴加擒捕其餘文武職員將校一切不問是日趙

巖張希逸張漢傑張漢倫張漢融朱珪敬翔李振及契

丹實喇鄂博等并其妻孥皆斬于汴橋下又詔除毀朱

氏宗廟神主偽梁二主並降為庶人天下官名府號及

寺觀門額曾經改易者並復舊名時帝欲發梁祖之墓

斷棺燔柩河南尹張全義上章申理乞存聖恩

通鑑張全義上

言朱溫雖國之深讐然其人已死刑無可加屠滅其家足以為報乞免焚斲以存聖恩

帝乃止令

剗去闕室而已丁亥梁百官以誅凶族于崇元殿立班

待罪詔各復其位

洛陽縉紳舊聞記載張全義表云伏念臣誤棲惡木曾飲盜泉實有瑕疵

未蒙昭雪因

以樞密使檢校太保守兵部尚書郭崇韜

下詔雪之

權行中書事己丑御崇元殿制曰仗順討逆少康所以

誅有窮纘業承基光武所以滅新莽咸以中興景命再

造王猷經綸于草昧之中式遏于亂畧之際朕以欽承

大寶顯荷鴻休雖繼前修固慙涼德誓平元惡期復本

朝屬四海之阡危允萬邦之推戴近者親提組練徑掃

氛祇振已墜之皇綱殄偷安之寇孽國讎方雪帝道爰

開拯編氓覆溺之艱救率土倒懸之苦粵自朱溫構逆
友貞嗣凶篡殺二君隳殘九廟虺毒久傷于宇宙狼貪
肆噬于華夷剝喪元良凌辱神主帝里動黍離之嘆朝
廷多棟橈之危棄德崇奸窮兵黷武戰士疲勞于力役
烝民耗竭其膏腴言念于斯軫傷彌切今則已梟逆豎
大豁羣情覩歷數之有歸實神靈之匪昧不得不臨深表
誠馭朽為懷將弘濟于艱難宜特行于赦宥應偽命流貶
責授官等已經量移者並可復資徒流人放歸鄉里京

畿及諸道見禁囚徒大辟罪降從流流已下咸赦除之
其鄭珏等一十一人未移復之限應扈從征討將校
及諸官員職掌節級馬步兵士及河北諸處屯駐守戍
兵士等皆情堅破敵業茂平淮副予勘定之謀顯爾忠
勤之節並據等第續議獎酬其有歿于王事未經追贈
者各與贈官如有子孫堪任使者並量材錄任應偽庭
節度觀察防禦團練等使及刺史監押行營將校等並
頒恩詔不議改更仍許且稱舊銜當俟別加新命理國

之道莫若安民勸課之規宜從薄賦庶遂息肩之望冀
諧鼓腹之謠應諸道戶口並宜罷其差役各務營農所
係殘欠賦稅及諸務懸欠積年課利及公私債負等其
汴州城內自收復日已前並不在徵理之限其諸道自
壬午年十二月已前並放北京及河北先以祆祿未平
配買征馬如有未請却官本錢及買馬不迨者可放免
應有本朝宗屬及内外文武臣寮被朱氏無辜屠害者
並可追贈如有子孫及本身逃難于諸處漂寓者並令

所在尋訪津置赴闕義夫節婦孝子順孫旌表門閭量
加賑給或鰥寡惻獨無所告者仰所在各議拯救民年
過八十者免一子從征其有先投過偽庭將校官吏等
一切不問云甲午以樞密使檢校太保守兵部尚書太
原縣男郭崇韜為開府儀同三司守侍中監修國史兼
真定尹成德軍節度使依前樞密使太原郡侯仍賜鐵
券乙未詔宰相豆盧革權判吏部上銓御史中丞李德
休權判東西銓事丙申滑州留後檢校太保段凝可依

前滑州留後仍賜姓名紹欽以金紫光祿大夫檢校司空守輝州刺史杜晏球為檢校司徒依前輝州刺史仍賜姓名紹虔詔處斬隨駕兵馬都監夏彥朗于和景門外時宦官怙寵廣侵占居人第舍郭崇韜奏其事乃斬彥朗以徇丁酉賜百官絹二千匹錢二百萬職事絹一千匹錢百萬戊戌以竭忠啓運匡國功臣天平軍節度使開府儀同三司檢校太傅兼侍中蕃漢馬步總管副使隴西郡侯李嗣源為依前檢校太傅兼侍中令天平

軍節度使特進封開國公加食邑實封餘如故以開府儀同三司檢校太傅北都留守興聖宮使判六軍諸衛事李繼岌為檢校太尉同平章事充東京留守詔御史臺班行內有欲求外職或要分司各許于中書投狀奏聞已亥宴勲臣于崇元殿梁室故將咸預焉帝酒酣謂李嗣源曰今日宴客皆吾前日之勍敵一旦同會皆卿前鋒之力也梁將霍彥威戴思遠等皆伏陛叩頭帝因賜御衣酒器盡歡而罷齊州刺史孟瑒上章請死詔原

之璆初事帝為騎將天祐十三年帝與劉鄩莘縣對壘璆
領七百騎奔梁至是來請罪帝報之曰爾當吾急引七

百騎投賊何面目相見璆惶恐請死帝恕之未幾移貝州

刺史庚子帝畋于汴水之陽十一月辛丑朔有司奏河

南州縣見使偽印望追毀改鑄從之以光祿大夫檢校

太傅左金吾上將軍兼領左龍武軍事汾州刺史李存

渥為滑州節度使加特進同平章事以雜指揮散員都

部署特進檢校太傅忻州刺史李紹榮為徐州節度使

以滑州兵馬留後檢校太保李紹欽為兗州節度使壬寅鳳翔節度使秦王李茂貞遣使賀收復天下癸卯河中節度使西平王朱友謙來朝乙巳賜友謙姓改名繼麟帝令皇子繼岌兄事之以捧日都指揮使博州刺史康延孝為鄭州防禦使檢校太保賜姓名繼琛以宋州節度使檢校太尉平章事袁象先依前為宋州節度使仍賜姓名紹安以匡國軍節度使檢校太尉同平章事溫韜依前許州節度使仍賜姓名紹沖丁未日南

至帝不受朝賀戊申中書門下上言以朝廷兵革雖寧
支費猶闕應諸寺監各請置卿少卿監祭酒司業各一
員博士兩員餘官並停唯太常寺事關大禮大理寺事
關刑法除太常博士外許更置丞一員其王府及東宮
官司天五官正奉御之屬凡闕不急司存並請未議除
授其諸司郎中員外應有雙曹者且置一員左右常侍
諫議大夫給事中起居郎起居舍人補闕拾遺各置一
半三院御史仍委御史中丞條理申奏其停罷朝官仍

各錄名銜具罷任時日留在中書侯見任官滿二十五箇月並據資品却與除官其西班牙上將軍已下仍望宣示樞密院斟酌施行從之時議者以中興之朝事宜恢廓驟茲自弱頓失物情已酉詔應隨處官吏務局員寮諸將軍校等如聞前例各有進獻直貢章奏不唯褻黷于朝廷實且傍滋于誅斂並宜止絕以肅化風又詔左降均州司馬劉岳有母年踰八十近聞身故準故事許歸候三年喪服闋如未量移即却赴貶州壬子詔取今月

二十四日幸洛京以十二月二十三日朝獻太微宮二十四日朝獻太廟二十五日有事于南郊癸未中書門下奏應隨駕及在京有帶兼官者並望落下只守本官從之乙卯以特進檢校太傅開封尹判六軍諸衛事充功德使王瓚為宣武軍節度使使權知軍州事丁巳以銀青光祿大夫尚書左丞趙光胤為中書侍郎平章事集賢殿大學士以朝散大夫禮部侍郎韋說守本官同平章事以吏部侍郎史館修撰判館事盧文度為兵部侍

郎充翰林學士以右散騎常侍充弘文館學士判館事
馮錫嘉為戶部侍郎知制誥充翰林學士以翰林學士
守尚書膳部員外郎劉昫為比部郎中知制誥依前充
職以扈鑾書制學士行尚書倉部員外郎趙鳳為倉部
郎中知制誥充翰林學士以左拾遺于嶠守本官充翰
林學士戊午以中書侍郎平章事豆盧革判租庸使兼諸
道鹽鐵轉運等使新羅王金朴英遣使貢方物己未以
洛京留守判六軍諸衛事守太尉兼中書令河南尹魏

王張全義為檢校太師守中書令餘如故以荆南節度使檢校太師守中書令渤海王高季興依前檢校太師守中書令餘如故庚申以工部尚書真定尹北都副留守知留守事任圜為檢校吏部尚書兼御史大夫充成德軍節度使行軍司馬知軍府事安義軍節度使李繼韜入見待罪詔釋之辛酉以宣化軍留後檢校太傅戴思遠權知青州軍州事檢校司空左監門上將軍安崇阮並檢校舊官却復本任以鎮國軍留後檢校太傅霍

彥威為保義軍節度留後以權知威化軍留後檢校司徒高允貞權知鎮國軍留後以權知河陽留後檢校太保張繼業依前權知河陽留後以廊延兩鎮節度使檢校太師兼中書令西平王高萬興依前廊延節度使仍封北平王襄州節度使檢校太傅平章事孔勅依前襄州節度使餘如故以永平軍節度使行大安尹檢校太保張筠為西都留守行京兆尹以晉州節度使檢校太保劉杞邠州節度使檢校太保韓恭安州節度使檢校

太保朱漢賓並檢校舊官却復本任壬戌以左金吾衛
大將軍史敬鎔為左街使右金吾衛大將軍李存確為
右街使甲子車駕發汴州十二月庚午朔車駕至西京
是日有司自石橋具儀仗法物迎引入于大內辛未以
百官初到放三日朝參壬申以租庸使刑部侍郎太清
宮副使張憲為檢校吏部尚書充北京副留守知留守
事太原尹詔改取來年二月一日行郊禮戊寅詔德勝
寨莘縣楊劉口通津鎮胡柳陂皆戰陣之所宜令逐處

差人收掩戰士骸骨量備祭奠以慰勞魂詔改偽梁永
平軍大安府復為西京京兆府改宋州宣武軍為歸德
軍汴州開封府復為宣武軍華州感化軍為鎮國軍許
州匡國軍復為忠武軍華州宣義軍復為義成軍陝府
鎮國軍復為保義軍耀州靜勝軍復為順義軍潞州匡
義軍復為安義軍朗州武順軍復為武貞軍延州為彰
武軍鄧州為威勝軍晉州為建雄軍安州為安遠軍淮
南楊溥遣人賀登極稱大吳國主書上大唐皇帝

十國春秋

吳世家云唐以滅梁來告始稱詔我國不受唐主隋易書用敵國禮曰大唐皇帝致書于吳國主王遣使司農卿盧蘋獻金器二百兩銀器三千兩羅錦一千二百疋龍腦香五斤龍鳳絲襪一百事于唐又遣使張景報聘稱大吳國主上書大已卯禁屠牛馬庚辰御史臺上言唐皇帝辭禮如牋表

請行用本朝律令格式今訪聞唯定州有本朝法書望下本州寫副本進納從之辛巳詔貶安義軍節度使李繼韜為登州長史尋斬于天津橋下再謀叛故也甲申淮南楊溥奚首領李紹威並遣使朝貢乙酉以翰林學士承旨盧質權知汴州軍府事以禮部尚書崔沂為尚

書左丞判吏部尚書銓事以兵部侍郎崔協為吏部侍郎
以刑部侍郎充集賢大學士判院事盧文紀為尚書兵
部侍郎依前充集賢殿學士判院事丁亥澤州刺史董
璋上言潞州軍變李繼達領兵出城自刎而死節度副
使李繼珂已安撫軍城己丑有司上言上辛祈穀于上
帝請奉高祖神堯皇帝配孟夏雩祀請奉太宗文皇帝
配季秋大享于明堂請奉太祖武皇帝配冬至日祀圜
丘請奉獻祖文皇帝配孟冬祭神州地祇請奉懿祖昭

聖皇帝配從之辛卯亳州太清宮道士上言聖祖玄元
皇帝殿前枯檜再生一枝畫圖以進詔曰當聖祖舊殿
生枯檜新枝應皇家再造之期顯大國中興之運同上
林仆柳祥既叶于漢宣比南頓嘉禾瑞更超于光武宜
標史冊以示褒瀛云五代會要唐高祖神堯皇帝武德
二年枯檜重華至安祿山僭號姜

瘁玄宗自蜀歸京枝葉復盛
至是再生一枝長二尺餘

壬辰幸伊闕

己巳以中書

舍人崔居儉為刑部侍郎充史館修撰判館事甲午以
祖庸副使光祿大夫檢校司徒守衛尉卿孔謙為鹽鐵

轉運副使

舊五代史卷三十

舊五代史卷三十攷證

莊宗紀四以趙光胤為中書侍郎平章事集賢殿大學士。○案歐陽史作趙光胤為中書侍郎不載大學士銜與是書詳畧異

甲子車駕發汴州十二月庚午朔車駕至西京。○案歐陽史作甲子如京洛庚午至自汴州是書作西京蓋其時未改永平軍為西京故尚仍梁制稱洛陽為西京也又通鑑攷異云諸書但謂之洛京未嘗詔改西

京為洛京至同光三年始詔依舊以洛京為東都或者以永平為西京時即改梁西京為洛京而史脫其文也歐陽史於元年冬即書洛京未審所據

詔改偽梁永平軍大安府復為西京京兆府○案歐陽史作十一月辛酉復永平軍為西都與是書日月互異

實喇鄂博舊作撒刺阿撥今改

舊五代史卷三十 政證

欽定四庫全書薈要卷五千四百三十二

舊五代史卷三十一

宋門下侍郎參知政事監修國史薛居正等撰

唐書第七

莊宗紀五

同光二年春正月庚子朔帝御明堂殿受朝賀仗衛如
式壬寅南郊禮儀使太常卿李燕進太廟登歌酌獻樂
舞名懿祖室曰昭德之舞獻祖室曰文明之舞太祖室

曰應天之舞昭宗室曰永平之舞甲辰幽州上言契丹

入寇至瓦橋

契丹國志時契丹日益強盛遣使就唐求幽州以處盧文進

以天平軍

節度使李嗣源為北面行營都招討使陝州畱後霍彥

威為副率軍援幽州已已故宣武軍節度副使權知軍

州事檢校太傅王瓚贈太子太師丁未詔改朝元殿復

為明堂殿又改崇勲殿為中興殿戊申以振武軍節度

使檢校太傅同平章事李存霸權知潞州畱後以知保

大軍軍州事高允韜為檢校太保庚戌以涇原節度使

充秦王府諸道行軍司馬開府儀同三司檢校太尉兼
侍中李從暉為檢校太尉兼中書令依前涇原節度使
充秦王府諸道行軍司馬詔改應順門為永曜門太平
門為萬春門通政門為廣政門鳳明門為韶和門萬春
門為中興門解卸殿為端明殿是日詔曰皇綱已正紫
禁方嚴凡事內官不合更居外地詔諸道應有內官不
計高低並仰逐處并家口發遣赴闕不得輒有停滯帝
龍潛時寺人數已及五百至是合諸道赴闕者約千餘

人皆給賜優贍服玩華侈委之事務付以腹心唐時宦
官為內諸司使務諸鎮監軍出納王命造作威福昭宗
以此亡國及帝奄有天下當知戒彼前車以為殷鑒一
朝復興茲獎議者惜之新羅王金朴英遣使朝貢辛亥
中書門下奏準本朝故事諸王內命婦宰臣學士中書
舍人諸道節度防禦團練使畱後官告即中書帖官告
院索綾紙標軸下所司書寫印署畢進入宣賜其文武
兩班及諸道官員並奏薦將校並合于所司送納朱膠

綾紙價錢伏自偽梁不分輕重並從官給今後如非前
件事例請官中不給告勅其內司大官侍衛將校轉官
卽不在此限從之壬子蜀主王衍致書于帝稱有詐為
天使馳報收復汴州者詔捕之不獲癸丑有司奏郊祀
前二日迎祔高祖太宗懿祖獻祖太祖神主于太廟議
者以中興唐祚不宜以追封之祖雜有國之君以為昭
穆自懿祖已下宜別立廟于代州如後漢南陽故事可
也幽州北面軍前奏契丹還塞詔李嗣源班師鳳翔節

度使秦王李茂貞上表請行藩臣之禮帝優報之甲寅
帝于中興殿面賜郭崇勳鐵券有司上言皇太后到闕
皇帝合于銀臺門內奉迎詔親至懷州奉迎中書奏自
二十三日後散齋內車駕不合遠出詔改至河陽奉迎
以禮部尚書興唐尹王正言依前禮部尚書充租庸使
乙卯渤海國遣使貢方物幽州奏媯州山後十三寨百
姓却復新州戊午以前太子少師薛廷珪為檢校戶部
尚書太子少師致仕以前太子賓客封舜卿為太子少

保致仕以前太子賓客李文規為戶部侍郎致仕詔鹽
鐵度支戶部並委租庸使管轄庚申四方館上言請今
後除隨駕將校及外方進奉專使文武班三品已上官
可以內殿對見其餘並詣正衙以申常禮從之車駕幸
河陽奉迎皇太后辛酉帝侍皇太后至文武百寮迎于
上東門是日河中府上言稷山縣割隸絳州以太僕卿
李紓為宗正卿以衛尉卿楊邁為太僕卿西京昭應縣
華清宮道士張沖虛上言天尊院枯檜重生枝葉乙丑

有司上言南郊朝享太廟舊例親王充亞獻終獻行事
乃以皇子繼岌為亞獻皇弟存紀為終獻丙寅帝赴明
堂殿致齋丁卯朝饗于太微宮戊辰饗太廟是日赴南
郊二月己巳朔親祀昊天上帝于圜丘禮畢宰臣率百
官就次稱賀還御五鳳樓宣制大赦天下應同光二年
二月一日昧爽己前所犯罪無輕重常赦所不原者咸
赦除之十惡五逆屠牛鑄錢故殺人合造毒藥持杖行
劫官典犯賊不在此限應自來立功將校各與轉官仍

加賞給文武常參官節度觀察防禦刺史軍主都虞候
指揮使父母亡歿者並與追贈在者各與加爵增封諸
藩鎮各賜一子出身仍封功臣名號畱後刺史官高者
加階爵一級官卑者加官一資應本朝內外臣寮被朱
氏殺害者特與追贈應諸州府不得令富室分外收貯
見錢禁工人鎔錢為銅器勿令商人載錢出境近年已
來婦女服飾異常寬博倍費縑綾有力之家不計卑賤
悉衣錦繡宜令所在糾察應有百姓婦女曾經俘擄他

處為婢妾者一任骨肉識認男子曾被刺面者給與憑據放逐營生召天下有能以書籍進納者各等第酬獎仰有司速檢勘天下戶口正額墾田實數待憑條理以息煩苛是日風景和暢人胥悅服議者云五十年來無此盛禮然自此權臣懷戾伶官用事吏人孔謙酷加賦斂赦文之所原放謙復刻剝不行大失人心始于此矣庚午租庸使孔謙奏諸道綱運客旅多于私路苟免商稅請令所在關防嚴加捉搦從之癸酉宰臣豆盧革率

百官上尊號曰昭文睿武至德光孝皇帝凡三上表從之甲戌詔曰汴州元管開封浚儀封丘雍丘尉氏陳畱六縣偽庭割許州鄆陵扶溝陳州太康鄭州陽武中牟曹州考城等縣屬焉其陽武匡城扶溝考城四縣宜令且隸汴州餘還本郡丙子以隨駕參謀耿瑋為司天監丁丑以光祿大夫檢校司徒李筠為右騎衛上將軍戊寅辛李嗣源第作樂盡歡而罷己卯以河中節度使冀王李繼麟兼安邑解縣兩池權鹽使辛巳以檢校太師

守尚書令河南尹判六軍諸衛事魏王張全義為守太

尉兼中書令河陽節度使河南尹改封齊王以開府儀

同三司守尚書令秦王李茂貞依前封秦王餘如故仍

賜不拜不名

五代會要太常禮院奏李茂貞封冊之命宜准故棗州節度使趙匡凝之例施行秦

王受冊自備革輅一乘載冊犢車一乘并本品鹵簿鼓吹如儀從之

是日帝幸左龍武軍

癸未宰臣豆盧革率百官上表請立中宮制以魏國夫

人劉氏為皇后仍令所司擇日備禮冊命丁亥以天平

軍節度使蕃漢總管副使開府儀同三司檢校太傅兼

中書令李嗣源為檢校太尉依前天平軍節度使加實
封百戶並賜鐵券以前安國軍節度副使檢校太保左
衛上將軍李存乂為晉州節度使檢校太傅以北京皇
城畱守檢校太保左威衛上將軍李存紀為邢州節度
使加檢校太傅以蕃漢馬步都虞候兼東京馬步軍都
指揮使檢校太保朱守殷為振武節度使加檢校太傅
戊子以前右龍武軍都虞候守左龍武大將軍李紹奇
為鄭州防禦使以楚州防禦使張繼孫為汝州防禦使

已丑以振武軍節度使權安義留後檢校太傅平章事
李存霸為潞州節度使以捧日都指揮使鄭州防禦使
李紹琛為陝州節度使以成德軍馬步軍都指揮使右
監門衛大將軍毛璋為華州節度使壬辰樞密使郭崇
韜再上表請退樞密之職優詔不允癸巳詔曰皇太后
母儀天下子視羣生當別建宮闈顯標名號冀因稱謂
益表尊嚴宜以長壽宮為名樞密使郭崇韜奏時務利
便一十五件優詔褒美甲午奚王李紹威吐渾李紹魯

皆貢駝馬丁酉以武安軍衙內馬步軍都指揮使昭州
刺史馬希範為永州刺史檢校太保癸卯以光祿大夫
檢校左僕射行太常卿李燕為特進檢校司空依前太
常卿以御史中丞李德休為兵部侍郎以吏部侍郎崔
協為御史中丞三月甲辰故河陽節度使王師範贈太
尉乙巳以滄州節度使檢校太傅同平章事符習為青
州節度使以北京衙內馬步軍都指揮使右領軍衛大
將軍李紹斌為滄州節度使鎮州奏契丹犯塞詔李嗣

源率師屯邢州丙午以荆南節度使守中書令渤海王
高季興依前檢校太師兼尚書令封南平王以幽州節
度行軍司馬李存賢依前檢校太保為幽州節度使中
書門下上言近以諸州奏薦令錄頗亂規程請今後節
度使管三州已上每年許奏管內官三人如管三州已
下只奏兩人仍須課績尤異方得上聞防禦使只許奏
一人刺史無奏薦之例從之己酉以太子少保李琪為
刑部尚書庚戌幽州奏契丹寇新城是日詔諸軍將校

自檢校司空已下宜賜叶謀定亂匡國功臣自檢校僕射尚書常侍及諫議大夫並賜忠果拱衛功臣初帶憲銜者並賜忠烈功臣節級長行並賜扈蹕功臣中書門下上言州縣官在任考滿卽具關申送吏部格式本道

不得差攝官替正官從之

五代會要同光二年中書門下奏刺史縣令有政績尤異

為衆所知或招復戶口能增加賦稅者或辨雪冤獄能拯人命者或去害物之積弊立利世之新規有益時政為衆所推者卽仰本處逐件分明聞奏當議獎擢或在任貪狠誅戮生靈公事不治為政怠惰亦加懲罰其州縣官任滿三考卽具關申送吏部格式候勅除銓注其本道不得差攝官替正授者從之有司上言

皇帝四月一日御文明殿受冊徽號合服袞冕御殿前
一日散齋于內殿從之是日李嗣源上表乞退兵權詔
不允是時伶人景進用事閹官競進故重臣憂懼拜章
請退癸丑左諫議大夫竇專上言請廢租庸使名目事
歸三司疏奏不報唐州奏木連理詔先省員官除已別
授官外其左散騎常侍李文矩等三十人却復舊官太
子詹事石戩等五人宜以本官致仕將作少監岑保嗣
等十四人續勅處分丙辰責授萊州司戶鄭珏等一十

一人並量移近地尚書戶部侍郎知貢舉趙頌卒以中

書舍人裴晬權知貢舉禁用鉛錫錢丁巳中書門下奏

懿祖陵請以永興為名獻祖陵請以長寧為名太祖陵

請以建極為名從之淮南楊溥遣使貢賀郊天禮物

十國

春秋吳世家王遣右衛上將軍許確進賀郊天銀二千兩錦綺羅一千二百疋細茶五百斤象牙四株犀角十

株于戊午詔應南郊行事官並付三銓磨勘優與處分

唐

己未以大理卿張紹珪充制置安邑解縣兩池榷鹽使

辛左龍武軍以皇子繼岌代張全義判六軍諸衛事故

也癸亥以彰武保大等軍節度使北平王高萬興可依
前延州鄜州節度使檢校太保兼中書令北平王甲子
幸東宅夏四月己巳朔帝御文明殿具袞冕受冊尊號
曰昭文睿武至德光孝皇帝壬申以成德軍節度行軍
司馬權知府事任圜為檢校右僕射權北面水陸轉運
制置使甲戌以順義軍畱後華溫琪依前檢校太保充
畱後乙亥以天策上將軍武安等軍節度使守太師中
書令楚王馬殷可依前守太師兼尚書令詔在京諸道

節度使刺史令各歸本任丁丑以前幽州節度使內外
蕃漢馬步總管檢校太師兼中書令李存審為宣武軍
節度使餘如故己卯帝御文明殿冊魏國夫人劉氏為
皇后庚辰賜郭彥威姓名曰紹真癸未以宋州節度使
李繼安依前檢校太尉同平章事宋州節度使以許州
節度使李繼沖依前檢校太尉同平章事許州節度使
以襄州節度使孔勣依前檢校太傅同平章事襄州節
度使甲午以樞密副使通議大夫行內侍省內侍宋唐

王為左監門衛將軍同正依前樞密副使以內客省使
通議大夫行內侍省內侍楊希朗為右監門衛將軍同
正依前內客省使並賜推忠匡佐功臣車駕幸龍門丙
戌回鶻遣使貢方物己丑以夏州節度使李仁福依前
檢校太師兼中書令夏州節度使封朔方王以朔方河
西等軍節度使韓洙依前檢校太傅兼侍中充朔方河
西等軍節度使靈鹽威警雄涼甘肅等州觀察使辛卯
以宣徽南院使判內侍省兼內局特進左監門將軍同

正李紹宏為右領軍衛上將軍癸巳以靜江軍節度使
扶風郡王馬賓為檢校太師兼中書令依前靜江軍節
度使以朗州節度使馬希振為檢校太傅兼侍中依前
朗州節度使鳳翔節度使秦王李茂貞薨丙申潞州小
校楊立據城叛以李嗣源為招討使陝州畱後李紹真
為副率師以討之

舊五代史卷三十一

舊五代史卷三十一攷證

唐莊宗紀五開府儀同三司守尚書令秦王李茂貞


秦王通鑑改作岐王

鎮州奏契丹犯塞詔李嗣源率師屯邢州○案通鑑詔
橫梅節度使李紹斌北京指揮使李從珂帥騎兵分
道備之與是書異

靈鹽威警雄涼甘肅等州觀察使○案威警疑當作威
涇攷通鑑注云警州在涇原西今仍其舊



舊五代史卷三十一攷證



總校官編修臣朱鈐

校對官助教臣李巖

謄錄監生臣謝雲